



**Siverth K. Heilmann**  
**Atassut**

**UPA 2023/167**  
**14. april 2023**

**Nunatsinni demokratiimik tamallu oqartussaaqataanerannik qanoq paasinnittariaaseqarnerput pillugu apeqquaqat aallaavigalugu oqallisissiasatut siunnersuut.**

(Inatsisartuni ilaasortaq Aqqalu C. Jerimiassen, Atassut)

Malunnarpoq ullutsinni innuttaasut kamassaqartut nunatsinni aqutsineq naammaginagu. Uanga tamanna aqutsinerluttoqarsimaneranut takussutissatut isigivara. Takussutissaavorlu nunatsinni demokratiskiusumik ingerlatsiniarnerput ilungersunartorsiortoq. Takussutissaavorlu politikikkut aqutsinitta ilusaa aqqitassaqartoq.

Uagut politikkerit pikkorinnerujussusariaqarpugut tamat oqartussaaqataanerat nukittorsassagutsigu. Partiit immitsinnut unamminerujussuarput annikillisariaqarparput suleqatigiinnerpullu annertusarlugu. Qassissaami misigilernerpara nammineerlunga siunnersuutigisarsimasakka oqariartuutigisartakkakalu itigartinneqariarlutik kinguninngua pigiliullugit suarutigineqartuartartut. Tassa angusaqarniarnitsinni kigaalaqut.

Siunertaq kusanartooq oqariartuutigiuarlugu uteqattaartuartarparput, suugaluarpalluunniit. Inatsisartullu pikkorluppallaarpugut siunertap taassuma kusanartup QANOQ anguneqarnissaa takutissallugu. Inatsisartummi oqarluartaaginnavikkutta sulinissaraluarput angusaqarnissaraluarpullu naassaangitsumik qineqqusaarfittut atortuassavarput. Taamaammat paasinartorujussuuvoq inuit ullutsinni taamak kamassaqartigimmata.

Ingerlariaqqikkuminaatsumillu inissisimajuarnerput takussutissaavoq qineqqusaarnermi piviusorsiuungippallaarnerput, kusanartuinnarnillu iluartuinnarnillu inuit tusaassallugit nuannarisaannaavinnik oqariartuuteqartuaannarnerput. Demokratiskiunerusumillu ingerlassagutta, malunnaatilimmillu angusaqassagutta piviusorsiornerusariaqarpugut, piviusumillu qinigaaffiup tullissaanut angusinnaasatsinnik oqariartuuteqartarluta. Nuannersorsuarnik angujuminaatsunillu oqariartuuteqartualluta inuit pakatsisittuassavagut kamassaqaalersillugillu.

Tamatta akisussaaffeqarpugut. Innuttaasut uagullu aamma politikkerit. Naammangilaq politikkeritut ajornartorsiut suarutigiinnassallugu. Oqarsinnaasariaqarpugut qanoq tamanna anguneqassanersoq. Innuttaasuuugullu tamatta politikikkut annerusumik malinnaanerulertariaqarpugut ukiorparujussuit ingerlatsiuarsimasut neriorsuiuarlutik nikisitsinissamullu artorsartuarsimasut qinertuassanngikkutsigit. Allannik tamatta pisuutitseqattaarunnaartariaqarpugut, uagut akisussaaffeqarpugut. Uagummi akisussaaffeqartutut misigisimagutta iliuuseqarlutalu allannguisinnaassuseqarpugut. Allammi iliuusaat aqussinnaangilagut.

Atassummiillu isumaqarpugut demokratii nukittorsassagutsigu liberaliunerusumik eqqarsartariaqartugut. Talerperliunerusut naleqartitaat tusaanerusariaqarpagut. Kiffaanngissuserlu inunnut utertillugu. Tassa demokratii. Imaassanngilarmi demokratii tassaasoq qinersigutta tassa.

Qinikkatta sinnera tamaat suliarissavaat. Socialistiskiuallaamimmi ukiorparujussuit ingerlatsiuarnerup takussutissaraa inuit akisussaaffiiagaanerat, utaqqiinnartunngorsimanagerat, pisortanik naatsorsuuteqarpallaalersimanagerat, susoqanngippallu kamassaqalersimanagerat. Talerperliunerusumik ingerlalertariaqarpugut oqimaaqatigiissumik, taamaaliornikkullu inuit misiginerulissapput nammineerlutik allannguisinnaallutik iliuuseqarsinnaallutik namminerlu akisussaaffeqarnerullutik nammineq inuunerminni. Uagut politikkerit qulaaniit aqutsinata sinaakkutaasussat suliarissaqqaarpagut.

Siunnersuuteqartoq Aqqalu C. Jerimiassen qujaffigerusuppara oqallissaarutaanut. Inuillu tamassi tusarnaartusi kaammattorusuppassi eqqarsarluaqqullusi. Qinersilerussilu eqqaamagisiuk: Qinikkassi akileraarutisi kaasarfimmiit aningaasaatisi oqartussaaffigilertarpaat. Atassummiit taakku aningaasat inuullu oqartussaaffia inummut utertinnissaat anguniarparput, akileraaruterparujussuit akitsuuterparujussuillu pisortaqaqarferujussuarnut atorunnaarlugit. Tassa oqartussaaqataanerup tunngavippiaa. Allat pisuutiinnarnagit akisussaaffik nammineerluta tigutigu. Qujanaq.